

Obolo

/1 Ina me lek na, me inigban; ini iko na inyi ibot ejit kinyi ikup me ugwem. Okaan-ene Jisos onenito urok inyi ema ibe, Ene ge oninana isi iwop mfut me uko kan.

Mgbo ikigwo mfut cha ifiaak, usini ororon me eden oniin.

Ebi ene ejajak me ukot iraka, ebi ke ofut enenitok otutuuk imeen isana.

Usini mfut cha ororon me ijona ewuuk.

Mgbo itibibe isibi, ikwakwaan isana mije kpunu mun me irak ijona ya.

Usini mfut ororon me ijona ere ukpak okupbe.

Ukpak melek mfut cha ebgbaan itibi isibi.

Ukpak cha otitibi ikana ichit nsek otu mfut cha.

Ikachieek ibe itibi ijaan, me ito ata mfut.

Ire, usini mfut cha ororon me ata ijona, me itibi isibi, me ito ogbogbo mfut owawa, efit mgbo, igak echu esabe iwop.

Itutumu ikeyi isana, inenibe ema, Ibot urok ya ire ikeyi: Mfut ya ire iko Awaji.

Echi ororon me eden oniin ire ebi inono iko ya, ire, Yok onunu initeen iko ya isana me ejit kiban, inyi ema ekakot ichieek, me iboko unyana.

Mfut echu ororon me ijona ewuuk ire ebi iboboko iko ya itap me unwoon mgbo ema enobe.

Ire, iko ya ikatibi ugwan-ijon me emen kiban.

Ema echieek me lek iko ya sontiik mgbo.

Ire, mgbo ntomkpo onube, ema ewawaka iron.

Mfut echu ororon me ijona ukpak ikeke inyi ebi inono iko ya, me iboko itap.

Ire, ike mgbo okije, uyorolek linyon, me ulok inu uboon, me ubelejiti eyi linyon onenikana ichit iko ya, me iro inyi mfut kan ikakiput ikan, me irene kubok ge.

Ire, mfut echu ororon me ata ijona ikeke inyi ebi inono iko ya, me iboko itap me ata ejit, me itet ikaan, me igban uton me lek, me ikat ejit ikeke inye mege ire mgbo itobe mfut.

Okaan-ene Jisos onenitumu inyi ema ibe, Me atiko, nkatumu inyi enyi ibe, ene geelek onono iko na, me ichieek me lek ogwu oraria emi inu, ene ya ikaan ugwem ikakaange itata.

Kpebetip si omo oyerebet geege.

Ire, omo isaba inana me mkpa inin me ugwem.

/2 Isiki lek kinyi me isi Awaji, me iboko iko kan eyi itapbe enyi me emen ejit.

Mije, iko ya obokot inyana enyi isibi.